



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 3 Yangia anidakangma : Tir Yimyim

tir_yimyim

tir yimyim

TAPAK 8

CM Mamata SIR dak sendakba
nung longkak aittsü amokmeren

Australia captain Cummins Ashes
Test tasembuba asayatsü



VOL. XXIII ISSUE NO. 66 (ADOK 66) DIMAPUR ROGONÜ (FRIDAY) LUCHII (DECEMBER) 12, 2025

₹ 5.00

Northeast kaketshirtemi CAA anema 'Black Day' amung

Kohima, December 11, 2025 (TYO): North East Students' Organisation (NESO) kübok Naga Students' Federation (NSF)-i Bodbarnü North East Black Day ayonga mungogo.

Naga Solidarity Park, Kohima nung agiba sentong nung Citizenship Amendment Act (CAA) magizükba nenshiogo.

December 11, 2019 nü Parliament nung iba Act agizükba tenüng amer Northeastern state ajak nung iba sentong ayonga agiogo.

"Northeast ajungalen iba anogo amungba ya asenok külemi longjemer magizüker ta sayuba lir. Tanü asenoki Northeast nung alir ajak den külemi iba Act magizükba sayur. Iba Act ya majung aser Northeast nung lisopurtem anema lir" ta NSF general secretary Kenilo Kent-i ashi.

"Asen lima ya talidak ka dang masü saka asen maitüsü, sobaliba aser putiotsü tasodak lir. CAA ajanga lisopur temetentem asoshi lendong bentsür arutsü" ta pai ashi.

"Kaketshir teloktemi Bill yangluba mapang nungi magizük. Tanü Northeast ajungai iba Citizenship Amendment Act anema Black Day amunger" ta NESO secretary general Mutsikhoyo Yhobu-i ashi.

Kaketshir teloktem aser lisopurtemi magizükaka 2019 küm iba kasa anogo nung Rajya Sabha-



December 11, 2025 nü Naga Solidarity Park, Kohima nung NSF-i Citizenship Amendment Act (CAA) magizükba sayua "Black Day" sentong ayonga amungdang agiba noksa angur.

i Act agizük ta pai ashi.

NESO-i iba Act ya Northeast nung mamshitsü takhangba agüja arur. ILP aliba state tem nungbo mamshir saka Northeast ajungalen timtem ajurutsü ana nung lir ta Yhobu-isa ashi.

"ILP kübok mesüra ILP mamshiba state tem süang, Northeast nung ajak lisopurtem dang lir" ta paisa shisem.

NESO den member bodies külemi Black Day amungtsüsa akümer aser iba ya Centre sorkar dang asenoki iba Citizenship Amendment Act magizüker ta sayutsü atema lir ta Yhobu-isa metetdaksü.

NSF-i tanep yakta tejashi sayua wako tanak asong. Onoki lisopurtem temeten atema noktaker

ta president Mteisuding-i ashi.

CAA magien tashi NSF-i teti iba Act anema noktaksü. Iba Act nung tashiyim keta lir aser tarutsü Naga temetentem aser matsü nung kongshitsü ta pai ashi.

"NESO aser AAPSU-i külemi noktakba atema pelar. Asenok atema iba ya tongtipang anogotem rongnung ka lir, kong asenoki lisopur temetentem kümzüka ayutsüla" ta Mteisuding-isa ashi.

AAPSU tenüng nung jembidang vice president (protocol) Nabam Gandhi-i Act nung tashishitsü aketbatem zünga metetdaksü.

"Iba Act mapa makümdang asenoki iba ajanga lokti aser rongsenketzüng nung kongshitsü alibatam asadanga reprangtsüla.

CAA ajanga Arunachal Pradesh, Nagaland aser tanga lisopur state tem atema meblemetsü" ta pai ashi.

"Centre-i ILP exemption agütsüba ya lisopurtem mesüzüksü atema dang lir. Iba ILP ya mashii mapang ka nung agientsü akok. Tangalen nungi arurtem maziökba ajanga lisopur sobaliba, inyaksangshi aser ali rongsen jenjang mejungi küm daksütsü" ta Nabam Gandhi-isa metetdaksü.

"Ano naturalisation period küm 11 nungi küm 5-6 ajemba ajanga lendong talila bentsür arutsü. Iba Act ajanga security asoshi teblemetsü bentsür arutsü kechiyong tawa northeast telungi bendanger itdangitertem aruba putetogo" ta paisa shisem.

"Asenoki iba Act magizüksü.

Asenoki linük ka, Northeast ka atema noktaker" ta Gandhi-isa shisem.

Taoba NSF president aser NESO secretary general Senchumo NSN Lotha-ia o jembidang. Illegal Migrants (Determination by Tribunals) Act, 1983 amala telemsa adokba ozüngtem anema noktakba indang bener arua lemsatop.

"NESO-i Supreme Court nung petitioner Sarbananda Sonowal ajanga IMDT Act anema ken o benok aser küm 22 lir külen takok angu, ibaji 2005 nung IMDT Act liasü" ta NSN Lotha-isa ashi.

"Tan-a NESO-i Supreme Court nung CAA anema ken o benokogo aser asenoki takok angutsü ta ni amanger" ta paisa shisem.

CAA atema o atsütepba sülen Article 6B ajanga Constitution nung mezüng atema Bengal Eastern Frontier Regulation (BEFR) indang jembia liasü. BEFR ajanga Nagaland, Mizoram, Arunachal Pradesh o Manipur ILP benshir ta NSN Lotha-isa ashi.

Ajisüaka ILP liaka Act ajanga northeast nung lisopurtem temetentem nung kongshir, ta paisa shisem.

Iba anogomung tenüng nung NESO secretary general Yhobu-i anir CAA documents mi agi rondok. Iba ajanga Northeast nung public-i Act magizükba sayur.

DMC nung mapa inyaketemi lungkak aiter

Dimapur, December 11, 2025 (TYO): Dimapur Municipal Council (DMC) kübok sanitation workers-i Brihostibarnep nungi "no pay, no work" lungkak aitiba tenzükogo.

DMC kübok mapa inyaketem nem tesüiba ita asem indang itasen magütsüba aser Employees' Provident Fund sen meinoktsüba atema lungkak aiter.

December 10, 2025 tashi nung itasen agütsütsü aliba magütsür lungkak aittsü ta December 4 nü parnoki shidi ka zülua liasü. Iba sülen December

9 nü DMC-i August ita atema itasen agüja liasü saka tanüngba ita asem indang ano magütsü lir.

Parnok nem tagütsütsü aliba itasen ajak aser EPF contributions meinoktsü tashi "No pay, no work" alitsü ta sanitation workers-i tanü nenshia metetdaksüogo.

DMC-i tanü ita ka itasen aser December 20 tashi nung ano ita ka itasen agütsütsü nangzüka liasü saka ibaji mapa inyaketemi magizük. Parnoki ita asemprong itasen angu nung dang mapa inyaksü ta shiogo.

Hornbill 2025 nung nisung lakh 2.14 tema aden

Kohima, December 11, 2025 (TYO): December 1 nungi 10 tashi Naga Heritage Village, Kisama nung 26 buba Hornbill Festival 2025 amungdang nisung 2,14,493 aden.

Yaküm dang nungi taküm nisung 8,525 teimba denogo. 25 buba Hornbill Festival nung nisung 205,968 dena liasü.

Taküm benjungmung locals, domestic travellers aser foreign tourists aikati shilem agia liasü aser iba ajanga India nung cultural tourism sentong tongtipang ka asüba nenshir ta Directorate of Tourism, Government of Nagaland-i metetdaksü.

Taküm foreign tourists 2,528, domestic visitors 56,431 aser local visitors 1,55,534 liasü ta parnoki ashi.

Bodbarnü single-day turnout

teimtiba liasü aser ibaji nisung 33,535 adenba lir. Benjung tembangba anogo foreigners 263, domestic tourists 8,479 aser local visitors 24,793 liasü.

26 buba Hornbill Festival anogo anabuba nung nisung 15,324 dang arua nisung tajemtiba aruba anogo liasü.

Anogo ternü amungdang anogoshia nisung 15,000 nungi 33,000 tema arua shilem agi aser iba ajanga Hornbill Festival ya global cultural attraction ka ama kümogo ta Joint Director Toka E. Tuccumi-i ashi.

Taküm benjung nung Austria, Ireland, France, Malta, Switzerland aser United Kingdom ajanga country partners aser Arunachal Pradesh-i state partner ama shilem agia liasü.

Hornbill Festival ajanga regional & international tesentaktep yangluogo

Kohima, December 11, 2025 (TYO): December 10 aser 11 anogotem Nagaland sorkari Arunachal Pradesh den Partnership Agreement ka aser Republic of Malta den cultural & economic dialogue liogo. Iba ya Hornbill Festival 2025 nung shilem ka ama inyakba mapatem lir.

December 10 nü Nagaland aser Arunachal Pradesh sorkartem tsüngda senden ka amendang tourism, agriculture, enterprise development, youth and sports, music & arts aser cultural exchange nung amalitepa aotsü nangzüktepogo.

Iba senden nung Partnership Agreement ka lemsatop aser iba ya tongtipang alizüng ka atongba lir ta Advisor to the Chief Minister aser Investment & Development Authority of Nagaland (IDAN) Chairman Abu Metha-i ashi.

Iba ama amalitep ayuba ajanga Northeast nung külem tashi tuluba akümtsü aser külemi renloka aotsü atema lenmang tasentem lapoktsütsü ta pai ashi.

Senden nung Nagaland Agriculture Advisor Mhathung Yanthan-i smart agriculture, watershed & springshed development, crop research, aser institutional capacity building indang lemsatop aser stata ana tsüngda tangatetba lemsateptsü indang nenshia liasü.

Northeast ya sobaliba,

purapitetba aser sempet nung kanga takar saka tashi ano menguteti lir ta Arunachal Pradesh Tourism Minister Pasang Dorjee Sona-ia ashi.

Northeast state tem tsüngda amalitep akangshitsü aser cultural industries ajungkettsü asoshi policy tajungtem nüngdaker. Maneni rongsenketzüng aintsü aser lanur asoshi maongkatem agütsütsüla ta pai ashi.

Nisung aikati Kisama nung Arunachal Pradesh Pavilion semdanga liasü. Iba Pavilion nung GI-based handicrafts, textiles, wellness products, traditional beverages aser tanga artisanal items sayu.

December 11, 2025 nü Nagaland-i Malta Country Partner Roundtable ayonga amen. Iba senden nung mendenji Abu Metha liasü aser telok anaprongi music, arts, education, enterprise, creative industries aser youth engagement nung amalitepa aotsü asoshi maongkatem bushitep.

Abu Metha-i Maltese nunger pelashishia agizük aser Nagaland nung sobaliba akaba, alima sabang nung music ajanga shlem agiba aser Battle of Kohima nung otsütsü tatalokba indang lemsatop.

"Tesüiba mapang Malta nung British nunger yimsütsüba aser Naga putiotsü mesüktepa lir aser külem ajangshibatam ajanga sobaliba angatetteper. European

Union nung Malta ya züngsem tilatiba lir aser nisung o nisung tesentaktep nüngdaker, iba nung Maltese kibongtemi Nagaland nungi tanurtem adopt asütsü dena lir" ta Malta nungi High Commissioner to India, H.E. Reuben Gauci-i ashi.

"Malta nung shisaliok senmang tajung lir aser putu 18 buba nungi University of Malta tenzüka liasü. Iba nung ajemdaker Nagaland University den amalitepa aotsü pelashishia agizüker" ta Gauci-isa ashi.

"Naga kaketzülurtemi kanga junga züluba atema tenüngsang agütsür. Parnoki züluba ya international readership langa lir" ta Maltese telok nung züngsem Professor Norbert-i ashi.

Malta aser Nagaland nung shisaliok rejutem tsüngda academic exchanges, author residencies, aser cultural collaborations mulunga lir, ta paisa shisem.

Senden nungsa University of Malta ajanga hospitality sector employment, academic exchange nung maongkatem aliba aser creative sectors nung amalitep aotsü indang lemsatopa liasü.

Hornbill Festival sabang ajanga Nagaland-i regional partnership, international collaboration, economic progress aser cultural exchange tenangzüka ayuba jangjatsür ta IDAN-i metetdaksü.

Mon nung Internatonal Hornbill Festival 2025 tembangogo



Deputy Commissioner, Mon, Wennyei Konyak, NCS-i International Hornbill Festival, 1st Mon Edition tembangba sentong nung jembidang tangokba noksa nung angur.

Dimapur, Luchii/December 11 (TYO): Anogo asem International Hornbill Festival, 1st Mon Edition sentong December 10, 2025 nü tembanga Konyak Heritage Complex, Mon nung agidang tetushi tesemdang ka ama Deputy Commissioner, Mon, Wennyei Konyak dena liasü.

Sentong nung Konyak-i jembidang, district-i International Hornbill Festival, Mon Edition bener

aruba atema Chief Minister Dr. Neiphiu Rio aser sorkar dang pelaba lemsatepa liasü.

CM indang mangdang aser sobaliba jenjang ajungkettsü aser ajak kasa terenlok alitsü bilemba ajanga district nung nüburtem ajungmesoogo aser anogo asem benjongmung ya telungjem, sobaliba, maitsü benjongmung ka liasü, ta pai ashi.

Konyak nung sobaliba tajung benjongdang iba

benjongmung ajanga district nung telungjem tali adokdaksüogo, ta DC Mon ajanga ashi aser nüburtem dang tarutsü anogotem nung tali amalitep akatsü aser lungjemshitsü ajungshia liasü.

Mon nungi MLAs tem iba benjongmung nung adenba aser yaritepba atema pelaba lemsatep aser departments of DUDA, Tourism, Art and Culture, TaFMA, Konyak Union, KNSU, Cultural Troupes aser sentong takok ngua agitetba nung shilem agir ajunga nem tenünsang agüja liasü.

Iba sülen local artists temi shilem tajung agia liasü. Item rongnung Nagamese ken atener David Konyak-i Bura Baba ken aten, Honted Konyak-i Konyak oshi nung Zowe ken aten aser TaFMA nungia shilem agia liasü.

Aji masü0dang Indigenous Games Competition nung Chingai aser Zaklom wards nati Dao Sharpness competition nung mezügbuba aser tanabuba jenjang ngutet aser Traditoonal Wool Spinning nung Jahjon aser Techa ward ajanga mezügbuba aser tanabuba jenjang angu.

Bamboo Race Ward-wise competition nung Tompong ward-i mezügbuba aser Shamnyu aser Chingai wards temi tanabuba jenjang ngua liasü.

Mokokchung Chamber of Commerce & Industry-i sangdonger

Dimapur, Luchii/December 11 (TYO): Mokokchung Chamber of Commerce & Industry (MCCI) ajanga nüburtem dang sangdong ka agütsüba nung, shishilempadak tesem nung shishilempar aser business balala kibur dang concert tickets, raffle mesüra lottery tickets, buffet coupons, tambola slips aser item mesükbatem densema calendars aser tickets ayoktsü khenyongi memelar, ta ashi.

Nisung kari danga shishilempar dang iba amala oset ajungshia yokra, itemji tashiyim amshia senotsü meshiba den sako özüng alema inyaksangshiba ama züngshitsü, ta ashi.

Winter Night Carnival nung stall kibur, shilem agir aser sentong ayonger tem dang temeket tesem nung amenoka aliba business kiburtem akumtsüboa amshitsüla aser ajaki mürekmeju alitsü imlar, ta MCCI ajanga ashi.

Mokokchung nung tashiyim amshia donation meshiba khenyongi memelar. Naga Political Groups indang cadres aser functionaries densema kija mesüra telok kari danga tashiyim amshia senotsü meshiba mesüra shishilempar temeden anema inyakba metetra tapet temerenshi agütsütsü.

Tim ketdangsür nungi jelia temelaba magie özüng agi

memelaba firecrackers belenba, ayuba, ayokba mesüra apokba memelar. Iba ama maparen nung shilem agiba shishilempartem özüng agi melaba ama alentsü, ta ashi.

Business owners temi yimya masüba mamshitsü metetdaksür.

Business kibur temi pei establishments kima kibur indang gari masü customers indang gari anentsüsa tesem wazüka yutsütsüla, kechiaser iba ama yimya amshiba ajanga customers tem aiben timtem ajurur.

MCCI ajanga benjong salem ajak dangi abener aser ajak dang tangatetba tajung nung benjong amungtsü ajungshir, ta kasa sangdong ajanga ashi.

Noklak DPDB senden menogo



Noklak DPDB senden alidang DC, P. Mono Khamniungan-i jempiba noksa nung angur.

Dimapur, Luchii/December 11 (TYO): Noklak District Planning & Development Board senden December 11, 2025 nü Deputy Commissioner, P. Mono Khamniungan lenisüba kübok DC Noklak indang Conference Hall nung mena liasü.

DC ajanga züngsem ajak pela agizükba o jembi aser DPDB züngsem tasentem metetpela mapang agia liasü.

Iba sülen taoba senden nung lemteta alibatem lepa reprangshi aser 56 Noklak Assembly Constituency aser 57 Thonoknyu Assembly Constituency kübok LADF 2025-26 atema Verification Committee ka tenteta liasü. Committee nungya 56 Noklak A/C atema SDO (C), Noklak convener asütsü, EAC Nokhu member/secretary aser EE PWD (R&B) züngsem alitsü.

57 Thonoknyu A/C atema committee nung SDO (C), Thonoknyu convener asütsü, EAC Panso member secretary aser SDO PWD (R&B) züngsem asütsü.

Board-i Thangoun village aser Jejeiking village nung Government Primary School lapoktsü indang jembia yimtsüng ana indang VCC nem agütsü aser züngsem temi jembia SDEO Noklak ajanga verify asüba sülen board-i nungdakba mera agitsü atema temaba ketdangsür dangi yok.

CMO Noklak ajanga Thangoun village nung Sub-Centre ka amenoktsü indang onük benoka jembi department dangi yok.

Elements Project Nagaland ajanga parnok inyakyim indang osang agütsü aser iba sülen Pre-Christmas sentong agia liasü.

Gorkha lenirtemi NSF & Inner Line Regulation Commission ajuru



Kohima, Luchii/December 12 (TYO): Nagaland Gorkha Association (NGA) nungi lenirtem den Chümoukedima Gorkha Union, Dimapur District Gorkha Indigenous Forum, Gorkha Public Panchayat Kohima, aser Gorkha Youth Association Kohima nungi teshimtet nisungtemi December 11, 2025 nü NSF Office, Kohima nung Naga Students' Federation (NSF) ketdangsür aser par Inner Line Regulation Commission (ILRC) ajurua liasü.

Parnok ya NGA tir Nobin Pradhan-i anir ao.

NSF tir Mteisuding menden sür sensaksemba mapang agia liasü, kong ILRC chairman Senchumo NSN Lotha, ILRC member secretary Seve R. Vadeo, aser NSF tongti zülur

Kenilo Kent nungertem dena liasü.

NSF den Inner Line Regulation Commission aser Nagaland nung Gorkha nung mapang talangka nungi tesendaktep tajung aliba tashi itshtitsü aser tajungba nung tangatetep adokdaksütsü nükjidong nung lokti ana tsüngta sensaksem tajung agia liasü.

Iba senden nung NGA lenirtemi NSF aser ILRC ajanga mapa tajung inyakba pelaba lemsatep aser state nung nüburtem ajungtsü atema maparen balala inyakba ajunga nung amalitep akatsü aser yariteptsü shia liasü.

Nagaland nung kin balala tesendaktep tajung nung alitsü aser kati ka dak tamang katettsü atema maneni sensaksema alitsü pangjemtepa liasü.



NATIONAL EDUCATION SOCIETY FOR TRIBAL STUDENTS (NESTS)

An autonomous organization under Ministry of Tribal Affairs, Govt. of India
Gate No. 5, Jeevan Tara Building, Parliament Street, New Delhi-110001

NOTIFICATION

Eklavya Model Residential Schools Staff Selection Examination (ESSE)-2025
NESTS has announced the recruitment of Teaching and Non-Teaching staff for Eklavya Model Residential Schools (EMRSs) through ESSE-2025. The Tier-I Examination for the posts of PRINCIPAL and ACCOUNTANT will be held on 13 December 2025, while the examination for TGTs, PGTs, and Miscellaneous Teachers is scheduled for 14 December 2025.

Candidates are advised to download their admit cards from the link provided below:

<https://examinationservices.nic.in/AdmitCardService/Admitcard/Login?aprefno=102992511>

The candidates are advised to visit "www.nests.tribal.gov.in" for future updates.

Issued by NESTS



**BIRLA
OPEN MINDS**
PRESCHOOL | TOULAZOUMA

24+
States
160+
Cities
280+
Institutes

A strong & sure start

WE'RE HIRING

Birla Open Minds School, Toulazouma,
is looking for passionate and dedicated
professionals to join our team:

Positions Available:

Centre head \ Counsellor
Preschool Teacher

Learning Year 1 (Pre-Nursery) | Learning Year 2 (Nursery)

If you're enthusiastic about shaping young minds and
being part of a vibrant educational community,
we'd love to hear from you!

SALARY:

Competitive salary based on
experience and qualification.

SEND YOUR CV TO:

centrehead.toulazouma@birlaopenminds.com

CONTACT NO.:

+91 94022 17371



School Location - BIRLA OPEN MINDS PRESCHOOL, H.No.- 302, 'C' Khel, Toulazouma
Village, Near Toulazouma Village Gate, Chumukedima, Nagaland-797103

IndiGo-i sen 10,000 alang travel voucher agütsütsü



**New Delhi, Luchii/
December 11 (Agencies):**

IndiGo Airlines passenger shirnok December 3 nungi 5 tsünga airport tem nung taolen makai küma liasü, parnok nem sen 10,000 alang travel voucher kaka agütsütsü, koba ita 12 tashi amshitetsü, ta airlines yagi Brehostibarnü metetdaksü.

"December 3/4/5 nü senzürtem shirnok airport balala nung ghonda aika taolen makai kümdakja liasü iba ya onoki sasasete agizüker. Onoki sen 10,000 alang travel vouchers agütsütsü. Iba travel voucher ya ita 12 tashi IndiGo tayimtsü nung amshitetsü," ta airlines sangdong ka ajanga Brehostibarnü metetdaksü.

Iba compensation ya flight ticket refunds aser sorkari sen 5000 nungi 10000 tashi agütsütsü atema atakzüksüba compensation den bendeloksema agütsütsü. IndiGo-isa, ticket aliba sen timba meyipa agütsüogo aser tanungba takaratiba nung

agütsütsü.

IndiGo Airlines ya India nung kanga tongtibang tayimtsü company ka lir. Taoba hopta inyakyim nung timtem adokba sülen linük ajunga nung tayimtsü meyirejang aika thitsü aser menomeyanga liasü. Tayimtsü inyakyim nung mepetmesü adokba sülen passenger tem aika airport tem nung taokenl makai kümdakja liasü.

Ken o bentetsü merangba mapang Brehostibarnüa IndiGo tayimtsü noklang ka dak tema thitsüogo.

Kasa mapang nung, tawa inyakiyim nung mepetmesü adokba dak sendakba nung data aser update densema IndiGo CEO Pieter Elbers Brehostoibarnü Directorate General of Civil Aviation (DGCA)-i jaokogo.

Bodhbarnü IndiGo mendenbuba Vikram Singh Mehta-i video osang ka ajanga, mepetmesü dak sendakba nung parnoki iba mepetmsü ya asa adokdaksü aser sorkar inyakyim melenshidaksütsü merang, ta asüba osang ya tai ta shiogo.

CM Mamata SIR dak sendakba nung longkak aittsü amokmeren

**New Delhi, Luchii/
December 11 (Agencies):**

Electoral rolls, Special Intensive Revision (SIR) dak sendakba nung West Bengal chief minister Mamata Banerjee-i Brehostibarnü ashiba agi, temsüa aliba nisung ka danga voter list nungi aginra longkak aittsü.

Mamata Banerjee-i, lai tang tashi enumeration form fill-up süa mali ta ashiba den, longkak aiterem dang ni lisopur ka ta kuli agütsütsü nüngdaka ali asü? ta lai asüngdang.

Bihar nung electoral roll asadangshiba sülen Election Commission of India (ECI)-i October ita SIR tanabuba shilem West Bengal densema

state aser UT 12 nung benoka inyaksü ta sangdonga liasü. West Bengal nung Trinamool Congress (TMC)-i aniba state sorkari EC-i iba jenjang agiba anema arudar aser ashiba agi, iba inyakyim ya Bharatiya Janata Party (BJP) ajangzükdaksütsü atema inyaker.

Brehostibarnü Krishnanagar nung rally ka nung shilem agiba mapang Mamata Banerjee-i, Election Commission-i SIR hearing mapang DM indang mapa achaayangtsü atema BJP den sendaka aliba ketdangsürtem Delhi nungi yoker, ta ashiba PTI news agency-i metetdaksü.

West Bengal nung election

2026 küm tetenzüklen agitsü lir. Union home minister-i Bengali nungertem ya Bangladeshi nunger kümtsütsü asoshi kechi südir süaka inyaktetsü aser parnok detention camp temi yoktetsü, ta Mamata Banerjee-i rally nung o jembiba mapang ashi.

Kasa mapang nung ECI-i West Bengal nung SIR inyakyim tembanga inyaksü atema mapang atakzüksüba atsülangtsüogo. Inyakyim ya 2026 küm February 14 nü tashi nung tembanga inyaksü atakzüksür liasü.

Bodhbarnü official order ka ajanga ECI-i ashiba agi, inyakyim aika anügdaka aliba ajanga mapang atsülangtsüogo.

Maharashtra nung ita 3 tsünga aluyimer 766 soseta asü: MP Fauzia



**New Delhi, Luchii/
December 11 (Agencies):**

NCP-SCP MP Fauzia Khan-i Brehostibarnü Rajya Sabha nung ashiba agi, Maharashtra nung taoba ita asem tsünga aluyimer 766 soseta süogo. Laisa sorkari aluyimertem dang ya kodang ang meima benshitsü ta asüngdang.

Zero Hour nung ken o benoka sensaksemba mapang Khan-i, linük nung aluyimertem soseta asüba nung Maharashtra temaba jenjang nung lir aser state sorkari ita asem tsünga aluyimer 766 asüba Assembly nem metetdaksüogo, ta ashi.

Asür kibongtem rongnungi kibong 676 nem sorkari teyari agütsüogo aser kibong 200 nem teyari magütsü lir, ta lai shisem.

Khan-i ashiba agi, taküm tzünglu kanga sashia arua tzümetsüng agi kongshiba sülen teyari sen crore 31,628 agütsütsü nangzük saka maparen mapa küma inyakba yabo khenyongi balaka lir.

Laisa, Union Agriculture Minister Shivraj Singh Chouhan-i Lok Sabha nung, teyari talila meshia ministry-i Maharashtra nungi temepeshiba kecha

magizük ta ashiba, tuteta ashi.

State Disaster Response Fund nungi aluyimer nem sen crore 4,176 agütsüogo, kong Centre indang shilem sen crore 3,180 liasü aser sen crore 82 aluyimer 1,13,455 indang account nung enoktsüogo, ta Khan-i ashi.

NCP-SCP MP-isa, data nung aibelen aliba metetdaksüogo aser ashiba agi, state Agriculture Minister Dattatray Bharne-ibo tzümetsüng agi district 19 nung ali hectare lakh 14.36 dak kongshiogo ta ashi saka Centre dangi yokba report nungbo ali hectare 1,10,309 dang shisema lir.

Maneni lai ashiba agi, iba ya kümshia tzüngluruwa mapang titem tilateri ajangshiba ka masü saka aluyimba nung mepetmesü tulu ka lir aser iba ajanga aluyimer lakh aika dak kongshiogo. Laisa, tang inyakyim benoka aliba ya teperi masü ta ashi.

"Ni sorkar dang ya asüngdang. Aluyimertem ya kodangang sorkari meima benshitsü," ta Khan-i asüngdang.

ICG-i Pakistan nunger angopur 11 sota yuogo

**New Delhi, Luchii/
December 11 (Agencies):**

Indian Coast Guard (ICG)-i Bodhbarnü, India tzüyim nung ozüng alema inyaksangshia aliba Pakistan nunger indang angopudang amshiba rong ka pua angopur 11 sota yuogo, ta ketdangsürtemi ashi.

Pakistan nunger anogpurtem ya Gujarat kübok Jakhau Marine Police nem bendanga agütsüogo aser ken o maneni bushisüngdangtsü.

ICG-i Brehostibarnü X nung sangdong ka ajanga iba osang jangjatsüogo aser ashiba agi, parnoki India tzüyim nung ozüng alema inyaksangshia aliba

Pakistan nunger indang anopudang amshiba rong ka apu aser angopur 11 sota yuogo

ICG-isa, iba jenjang agiba ajanga ICG kümküma aliba aser linük tzüyim kümzüka ayutsü aser MZI nung international maritime ozüng benoka inyaksü asoshi India bendanga agütsür aliba sayur, ta ashi.

Gujarat Defence PRO Wing Commander Abhishek Kumar Tiwari-i ashiba agi, iba operation ya kanga kara benoka inyaka liasü. X ajanga pai ashiba agi, Coast Guard-i India indang Exclusive Economic Zone (EEZ) nung Pakistan nunger indang angopudang amshiba rong ka

asir anogopur 11 puogo.

Pai ashiba agi, iba inyakyim ajanga Coast Guard indang maritime operation tem aser India tzüyim kümzüka ayutsü aser international temzüng ozüng shitak benoka inyaksü asoshi India bendanga agütsür aliba sayur.

Taoba küm ICG rong kati India nunger angopur tenet kümzük, shirnok Pakistan Maritime Security Agency (PMSA) rong kati India-Pakistan maritime arrtsü anasa pua liasü. ICG-i Pakistan indang rong ya ghonda anashi arishiba sülen anogopurtem ya chiokdakja liasü.



TIR YIMYIM YIMOBILEM (EDITRIAL)

DIMAPUR FRIDAY, DECEMBER (LUCHII) 12, 2025

Yi o Yisu na

Asenok limapur asüba mapangbo yi ya asen tsürabur sobaliba dak aketba chiyongtsü ka liasü. Aji oda, kidang tetsür mapaji yi asatsü aser teburtem chiajemer mapa inyaksü ta yi ya asen tsüraburtem asoshibo temang asoshi chiyongtsü tajung ka liasü. Ibayongji, kidang tetsürtemi yi asayonga, Aotsürtemi yi ajemba mangashi aser teburtema yi agi meseper rarabangsena senzübabo mangashi. Ajisüaka, kechiba Khristan yimsü arur külen Yisui pei taküm nung kibur ta agizüka amanger tamangertem dang yi majemtsü ajungshi ? Aser kodaser yi ya temenen chiyongtsü kümdaktsü (?) ta asenoksasa asüngdanga telangzüba bushitsü kanga nüngdaka kümogo. Atangji, asen tsüraburtem limapur aliba mapang benjongbentsü mapangbo yi agi meseper japujaritepba otsüa lir. Aji oda, yi ya temesepba chiyongtsü asünungji, ashiko, asenoki mangu, memetet aser mangashi dang ashi, tsüraburtem mapanga yi agi meseper sayatenyaba mapa aser otsüa alitsü. Iba jagi Aor rongnung mezüng Yisu dak amanger Khristan purtem dang yimsü sayurtemi yi majemtsü sayu südi. Aji oda, Yisu yimsü bener arua sayurtemi yi majemtsü aser moko machitsü sayu nungji, asenokbo tia ajung, yi aser mokoji temenen chiyongtsü kümdaktsüogo. Ibayongji, arogo nunger rongnung yi jemertemji tamanger tajung masü saka mazüok aser tamang nung atsüngzüka aoba purtem ama züngshir. Ano, asenok tia majung kaji, asenoka tangar tashitemetetertem tera mesüka azüng zülü shia kümer, asen lima tangar state-tem den gari lenmang agi sentaktepa akümdangbo, tangari machine nung yangluba yi bener arua ajemtsü tenzük, aser joko Nagaland-a state ka kümer tanem-tanemi tangari yangluba yi ayoktsü asoshi dokan dena lapokba dang masü saka asen lima nung mojitsü agi yangluba yi rum yanglutsü tenzük. Iba mapang nungbo, joko, akhi tsüraburtemi pei kidang yanglua ajemba yi to masü saka tsümar yi, rum, whisky aser brandy ta yi tapu balala asen lima nung talubosa angu. Iba ama yi agi ayong küma ayimbaji asen lima nung tamangertemi menokdangtet, kechiyong tamangertemi yi yanglu aser tamangertemisa ayok aser tamangertemisa ajem. Iba mapang yi ajem mashiba agi taküm aser kibong aika raksaogo. Joko, takoksa marem, yi yangluba, ayokba aser ajemba anema arogoi ola adok, anungji arogo ola aser tashi metizüktet government-ia Nagaland nung yi meyanglutsü aser mayoktsü asoshi ozüng latet. Ajisüaka, tia majung kaji Naga nungertemi yi mejemi melitet, kechiyong yi ajembabo ozüng agi menokdangteter, ibaibo peisasa tangatetba agi telemtetba agitsüla. Tanüa asenoki yi jemnü marem Nagaland nung yi yokdaktsüner, saka timtem kaji asenok asoshi yiji temenen lir. Yi ji temenen masü asübo asenok arogo nung tenzükertema yi jemer asüyonga shimla aser arogo sentongtem nunga yi amshila. Ibaji kodang bilemdangdir, arogo nungeribo kodanga yi yangluang, yi yokang aser yi jemang tabo mashitsü, anungji tanü Nagaland nung yi yokang ta ashirtem ya arogo nunger masü asütsü, kechiyong yi yokang ta ashibaji yi ajemba dang nungi tamajungba, aser Yisu dak amangba arogo nunger kati yamaji jembitsü tim masü. Anungji, tanü shirnoki Nagaland nung yi ayoktsüla ta akanger, ajia maitsür, kechiyong parnoki yi ayokang tajungba ta angatetba agi ashir, ajisüaka parnokji arogo nung lira tamasa parnoksasa arogo nungi atsüngtsüla. Iba kasaji, asenoki benjong tilaka ali majung ma ta yi amshir. Aji oda, Hornbill benjong nungbo asenoki anir yi ayoker aser ajemer. Ibaji asenoki Yisu tenüng nung meshiteta sarasademer ayoker aser ajemer asü, koda (?) ta asenok Yisu temeim yimsü mezüng agizükertemi bilemdangtsü tongtibang onük ka kümogo. Atangji, Yisu o Yi na ya meputep asünungbo, asenokang shi nung takoksa arema yi masü Yisu-ang shimtet kanga agia tajungba asütsü.

OLEMSABANG

KHRISTMAS MUNGPU ARUDANG ONOK TANUR NUNGI SANGRO KA ZÜNGDANGANG Niiiii...

Oh! Khristmas

~ Lanu Atsongchanger, 2025

Khristmas! Khristmas! ya kechi?
Nai-a ya khen bo shidangogo ma?
Ya alima benjung ka dang asü?
Benjung ya shibaibo memeratsü?
Süoshi tasen semer longsotepbaji koda jangratemtsü!
Chiyongtsü tapu aika langpang nung yur chiyongbaji koda!
Khristmas cake aser senpettsütepba tepelatsü masü no?
Ya adangji Khristmas benjungji lir.
Ozü tsürapur aser odila – oyala nungeri onok dang:
Khristmas mungpu ayaokdang
BoneyM aser Jim Reeves khen yimti ajak atemshia
temtepba menungraa ashi.
Tanurtem, telok – telok yimdong nung ken tena
senzütepba otsü ashi.
Khristmas atema Küm tepiypong charity box nung sen
bendena ayuba otsü ashi.
Iba sen bener tsürabur den jilai shishi aoba otsü ashi.
Kima ajak nung ao talangtiba nung PITINU
asongba otsü ashi.
Christmas aonung longsotepa mapok aam sanger chitepba
otsü ashi.
Saka tanü yimti – yimdong ajak kanga
azüngmeyaka kümogo.
Medemer den kimai odi asü nung “kidang mobile amshia
kazüang” ta-ang ashir.
Aya! Ozü tensabo benjung memesük, kidang dang
benjungtsübo jangra madema ni!
Tanü ozü putu nungbo yamai dang pei pei meden dang
litepa sayutsü no?
Oja, Oba, Odila, Oyala nungertem,
Onoki kechi tai inyakaba agi, yimdong ajak
azüngmeyaka kumtsür?
Iba ama benjung longso maliba ya
Onok putu atema ya tashi-ang ner putui
aazüka doktsür no?
Nenok tensa nung Khristmas koma longsotepa amung,
Iba runem nungji onokia mungdangner
Onok tanurtemi longsotepa Khristmas Carol oner.
Iba ya Khristmas benjungji lir, benjung ama onok
mungdakjang.
Onok dang Yisu asoba benjung tepela otsü shiang.
Onok mulungjung nung KHRISTMAS otsü tajungji yujang.
Oh! Khristmas, onoki na koda merar
Na ozü mulungjang nung teti tatem maka liangma.
Amen

Merry Christmas & Happy New Year



Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir

Pakistan nung Khristanpur atema tongtipang obendang agütsü



Khristanpur mürekmeju mapa inyaker Shan Masih (abelen) aser Asif Masih (achichi) na Faisalabad, Pakistan nung kilentzü aoba tesem kanga mejungi aliba inyakdang March 17, 2024 nü asü.

Lahore, Luchii/December 11 (Agencies): Pakistan nung obendang tongtipang ana agütsüba nung Islamabad High Court (IHC) ajanga December 9, 2025 nü mapa agütsür temi mürekmeju mapa inyaksü atema Khristanpur kisüing bushiba nokdang aser kilentzü aoba lenmang müreker kumzüka ayutsü mera agitsü ashi, shirnok Khristanpur timba lir.

Pakistan indang federal high court, IHC ajanga jana bendener aser ki aoker atema advertisements nung "Khristanpur kisüing" ta ojang amshiba tenokdangba agütsü aser jana müreker asür tali akumba azüoktsü asoshi tangsa mera tajung agitsü ashi.

Center for Rule of Law Islamabad (CROLI) aser Pakistan United Christian Movement (PUCM) lungjemer petitions agütsüba nung ajemdaker Islamabad High Court Justice Raja Inam Amin Minhas-i obendang agütsüba nung "Khristanpur kisüing" ta ojang amshiba ya kangasa majung aser tarutsü nungi mapa bushiba ajak nung "civilian" ta melentsü ashi.

Kilentzü aoba lenmang nung miim aliba tangola menemba yong 1988 nungi Khristanpur iba mapa inyaker 70 dak tema süogo aser civil society reports ajanga 2019 nungi nisung 10 shi asüba osang bendentetba nung ajemdaker obendanger temi kilentzü aoba lenmang müreker tem temang junga magütsüi temang nung timtem ajurutsü tensa nung yutsür aser miim aliba gases saokdaksür ta ashi.

Iba ama miim aliba tesem nung 'safety precautions' mali kilentzü aoba tesem müreker yutsüba ya senzüka yutsüba tebilemtsü tulu lir, ta Minhas-i ashi. "Jana aoker ya mechanical parts masü aser parnok temang kumzüka ayutsü atema safety equipments aser basic facilities agütsütsüla, aser iba ama mapa inyaker Khristanpur aayanger tem tanen makai asüba ya fundamental rights nung aibelenba aser sorkari constitution nung shia aliba meinyaktetba lir, ta pai zülü.

Ministries aser departments temi pei tashi mait agizüktsü melenatsükshia kati ka dak tai tongloksüteper, ta pai ashi.

"Public office inyakyim ya mapa shidak meinyaki jeshiba kusüing kumer asü? Constitution of Pakistan ajanga nübur ajunga kasa kumzüka ayutsü shia lir masü na? Kilentzü aoba lenmangtem müreker takum jenjang ya dangar dang nungi tajemba asü?" ta pai zülü.

Temang nung timtem ajuruba mapa inyaker densema senso ajunga kumzüka ayutsü, akumtsübotsü aser sako amshitsü Article 9, 25 aser 27 nung shia lir, ta court-i ashi. Pakistan-i Universal Declaration of Human Rights züingzüktepba aser domestic labor laws kübok mapa inyakba tensa tajung agütsütsü shia lir ta ashi.

Kilentzü aoba tesem nung mapa inyaker temi miim aketba underground gases ajurur, süchia aor, asür, temang tenük-telen raksar aser tashidak tamajung menar aser item lendong ya haidr, monitoring devices aser safety protocols amshiba ajanga kumzüktetsüba lir, ta Minhas-i pa indang obendang nung ashi.

High court ajanga federal sorkar dang federal aser provincial ministries, autonomous bodies aser private entities ajunga dang kilentzü aoba tesem anepalur nem protective gear, gas detectors, ventilation aser first-aid facilities tajung agütsütsü asoshi sangdong agüjang ta totuyuba agütsü.

Parnokisa item totuyuba mapa kuma inyakba insang osang tejangja ita ana tsüngta deputy registrar judicial nem agütsütsü tuyu.

Court-isa Ministry of Law and Justice dang kilentzü aoba tesem nung inyaker temeden wazüka ayutsü, kumzüka ayutsü, compensation aser insurance coverage atema ozüing yanglutsü mesüra tang aliba ozüing tem yanglushitsü tuyua liasü.

Iba obendang ana ya Pakistan nung tajemzüktiba aayanger telok asoshi

tongtipang mera alitsü, ta PUCM Chairman Albert David-i ashi.

"Kin tilatem dak sendakba nung mapang talangka lir constitutional institution ka nungi langka inyakogo. Onoki mezüing iba tebilemtsü ya executive (sorkar) ajanga bentettsü merang aser media nunga lemsatep, saka mapa kuma meinyaktet. Tatemsa onoki high court dangi abentsü telemtetba agi," ta pai ashi.

Obendang anaprong ya tajung lir, kechiaser obendangeri pa indang tangatetba lemsatepba kisüing masü saka mapa kuma inyakba osang agütsütsü talinba dena lir, ta David-i ashi.

Mürekmeju mapa inyaker temeden wazüka ayutsü aser kumzüka ayutsü obendang agütsüba ya Khristanpur atema kisüing masü.

"Iba yagi tamangba yimsü balala süaka sanitary workers ajunga indang takum nung kongshitsü," ta David-i ashi.

Pakistan nung mürekmeju mapa inyaker ya kanga bendanga amshir aser Khristanpur aser Hindu nunger ama tamangba yimsü tsütsü kin tilatem mapa ama züingshir.

Pakistan nütsüing yongsük shilem 96 dak tema Muslim nunger lir, aser Open Doors ajanga Khristanpur alitsü asoshi tamajungtiba linük 50 asadangba 2025 World Watch List nung Pakistan ya jenjang ti buba nung lir.

Chhattisgarh nung Khristanpuri benjong mapang security meshir

Raipur, Luchii/December 11 (Agencies): Chhattisgarh state nung Khristan lenirtemi ketdangsürtem dang Christmas aser Küm Tasen benjong mapang security agütsütsü ayongzü, kong kin tilatem anema azüdokshiba aser amokmerenba tali akumer ta parnoki ashi.

Chhattisgarh ya mapang talangka nungi Khristanpur anema inyaksangshiba tesep ka ama züingshia arur, kong Hindu nationalist telok temi missionary tem aser Khristanpur reju anema nokdaker.

2024 küm iba state nung Khristanpur anema mapa tamajung inyakba 165 liasü, koba India nung timtiba jenjang tanabuba alitsü, ta New Delhi nung aliba United Christian Forum ajanga ashir.

"Onoki December 8 nü Jashpur indang district magistrate ajuru aser Christmas mongpu mapang arogo aser tamangertem kumzüka ayutsü asoshi police meshia shiti ka agütsü," ta Rashtriya Christian Morcha (National Christian Forum) tir Kamal Kujur-i ashi.

Benjong sunepa amungtsü asoshi onoki district ajunga nung ketdangsürtem ajurutsü sentong lir, ta Kujur-i UCA News dang December 9 nü ashi.

"State nung tesüiba küm ishika tsüngta Khristanpur nem

ANOGO ABEN TSÜNGREM DEN

Kibuba nung pelaang

"Kibuba dak pelaang, aser Pai ne mulungi aginüba agütsütsü." T.Ken 37:4.

Yeremiai ashi, "Temulungjangji ajak dang tekülakba aser onsara majung" (Yer.17:9). Iba terasaba nung ajemdaker temulungjangi kechi janrar shisadangang. Alimai agütsüba nung tepelaji ken atema aser iba jagi temulungjang tali shirangdaksür. Saka nai Kibuba nung pelara, ne tejangraba melenshitsü. Asenoki Kibubai mulungba bushira ya takoktsü.

Asenok shi jangraba aser temeshiba tejangraba ana tsüngda nungji atsüteper. Yisui asenok dang ashi, "Temeshiba asoshi ya-a tzürartem temoatsü, kechiaser parnok tip atemtsü" (Mt.5:6). Nai aji amanger ama? Nai shi tejangraba tiptemdaktsütsü bilemra nai aji kodanga tip metemdaktsütettsü. Nai itemji ne takün nung tali anioka mesüli, na tali tayaba süli ta asütsü.

Asenok Khrista dangi arudang shi den toktepba ama, tanga den tetoktepba mali. "Kechiyong shi-i jangrabaji Tanela anema, aser Tanelai jangrabaji shi anema, kechiaser anaji anemer" (Gal.5: 17). Shi nisung shi tejangrabaji mazüokra onsara tesashi, anungji asenok sasa-a azüoker. Tanela tsütsü tejangrabaji merang korangji semoker anogo shia jajadi. Iba jagi asenok azüoka Pai mulungba ama shidak litettsü.

timtem agütsüba tali akumba sülen onoki tang benjong mapang timtem maginer," ta pai ashi.

Hindu nunger bhukumba Bharatiya Janata Party (BJP) yimsüsüba mendeni 2023 küm meyipa shilangba sülen tensa tamajungba kumogo ta Khristanpur lenirtemi ashir.

Party indang Hindu nationalist ideology den sensaktepa aliba local Hindu telok temi Khristanpur dak tenük yoker, aser parnok timba tribal nisungtem lir.

"Deobarnü sarasadem sentong agidang mesüra agiba sülen Hindu nunger telok temi onok indang house churches telungi aiter. Parnoki item tesem nung adenshia alirtem dang o shia merenshir aser azüker," ta pastor kati ashi.

Khristanpuri ken o agütsüba police temi aiben magizüker saka tamangba yimsü melentsü meranger ta Hindu activists temi tai tongloksübabo agizüker ta pastor temi ashi.

July ita activists temi railway station ka nung tai apuba sülen Catholic nuns ana tribal tsür Khristan asem den senzüa aliba mapang apu aser ozüing alema shibelen aser tashiyim amshia tamangba yimsü melendaksür ta tai tongloksü.

Parnok ya anogo toku tashi police ket nung yur August 2 nü bail nung chiok, saka iba ken o

ya court nung lir.

Police tem ajungshiba tali kumogo ta Khristanpur telok balalai ashir.

August ita police temi district ketdangsür nungi jelia temelaba agitsü tuyuba sülen Pentecostal house churches noklang aika Deobarnü tekülem sentep magiteti liasü.

Raipur nung police temi Pentecostal pastor 100 shi ajurua parnok dang "law and order" shidak alitsü mechi lokti adenshiba anentsü ashi, ta Chhattisgarh Christian Forum indang tir Arun Pannalal-i ashi.

November ita Khristan yimsü agizüker aser pastor tem yimtsüing telungi maittsü zülur yua aliba anema petitions agütsüba Chhattisgarh High Court-i magizükba sülen tebilemtsü tuluba akum.

Item zülü ya tribal sobaliba wazüka ayutsü tebilemba nung lir aser Constitution nung aibelenba masü ta court-i obendang agütsü - aser Khristanpur lenirtemi iba telemtetba ya ajanga parnok timtem tali ajurutsü ama bilemer ta ashi.

"Tawa Khristanpur anema inyakba tali kumogo," ta Raipur nung Khristan activists Sunil Minj-i ashi.

Chhattisgarh nütsüing yongsük million 30 shi aliba nungi Khristanpur shilem ana dang tajemba lir.

AO OSHI ANGAZÜKDAK:

TANÜ ANGAZÜKTSÜBA OJANG



Tir Yimyim

Tsüngi

(n) tsüngpret peret dang milong alileni aluba (lightning)

* Tsüngi agi sūdaksüba süngbo magir.

Tsüngilung

(n) tsüngi aiba tesem nung po mesük long angur (axe like lightning stone)

* Tsüngilong sentsü ya nenyanyar tsüngi aiba tesem nung angur.

OLONG PAITEP # 7357

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

- Nisung jenti
- Tsük rudenba
- Temzüng tesashi
- S___i
- Nisung rongnung telemasa
- Anogoshi
- Ajanga aor
- Tsük rizüngdak
- Tebang nungi adokba
- Süngdong tatembangtiba
- Meputep

LANGTSÜNGLEN

- Tenük telong
- Committee dang ajar
- Yagi ki okdoker
- Yim lenmang
- Temoatsü keter meyipa aruba
- Kanga junga menemba
- Kenyongi majinü
- Rong kanga tulu

OLONG PAITEP # 7356 TELANGZÜBA

TIPIEN :

- Semtu, 3. Lepko, 5. Bilem, 8. Ulu,
10. Tsüngpang, 11. Tesangwa,
13. Aoksa, 15. Putir, 16. Yipru.

LANGTSÜNGLEN :

- Sayu, 2. Teb, 4. Kimong,
6. Lungkak, 7. Milak, 9. Zünga,
10. Temopu, 12. Walu, 14. Ali.

NAI-A YA METETTER



December 9, 2025 nü Bharat Future City, Hyderabad nung Telangana Rising Global Summit alidang drone show ka sayua liasü aser iba ajanga "world's longest airborne sentence" otsü yanguogo. Iba show nung drones 3,000 amshia liasü aser Chief Minister A. Revanth Reddy-i Telangana Rising 2047 Vision document sayali iba ya sayu.

Drones 3000 amshia anüing nung 'Telangana is Rising. Come Join the Rise' zülua sayu.

MLAKhemchand-i relief camp aser yimtsüing ka semdangba ashishisir

Imphal, December 11, 2025

(Agencies): MLA Khemchand-i tawa relief camp ka aser hill village ka semdangba atema Kuki Inpi Manipur (KIM)-i ashishiteper aser pai kechi nükjidong nung iba mapa inyak ta asüngdang.

"MLA Khemchand-i Litan Sareikhong relief camp aser iba sülen Grihang village semdangdang security kanga akangkanga liasü. Iba ajanga pa kechi nükjidong nung iba mapa inyak ratar. Ibala inyakyim ajanga tensa süngjema lir ama tai sayur saka chichiba nungbo nisung meyrjang aika talidak toktsür oa lir" ta KIM-i ashi.

Kuki nungeri timtem aser takoksa jenti ajuruogo anungji pai semdangba ya kecha balaka mebilemer, kechiyong mangatettep lir aser temeten mangu lir ta parnokisa ashi.

MLA Khemchand-i tanü yimjung alitsü osang sangoktsüba ya tim masü kechiyong mangatettep adoka

raradang pai kecha meinyak aser ola madok ta KIM-isa metetdaksü.

Kuki public-i iba tensa ka nung "popular government" magizütsü saka yimtenren aser security tenangzükba agütsütsü akhanger ta KIM-i Centre sorkar dang shiogo.

Singjamei constituency nungi BJP MLA Yumnam Khemchand Singh-i December 8 nü Litan Sareikhong nung lapoka aliba relief camp semdang aser Kuki nunger kibong aika den ajuruteper. "Christmas tonga arur anungji asenok ajaki Manipur nung yimjung bener arutsü atema merangtsüla. Alima tesem balala nung mangatetteptem lir saka asenok tsüingda mangatettep aliyonga külemi liyonga aotsü merangtsüla. Yimtsüingtem semdangtepba nung tetsükdaksü kecha malitsüla" ta Meitei MLA Yumnam-i ashi.

"Asenok tsüingda mapang talangka mangatettep aliba ajanga asen chirnurtem tarutsü

meraktsütsüla. Tanü asenok lemdanga lir, Hills nung alirtem aser Valley nung alirtem meputep, saka asenoki asen chirnur tarutsü atema bilemstüla" ta paisa ayongzük.

BJP state vice-president H Shirmay ya Naga nunger lir aser pai MLA Yumnam Khemchand Singh-i relief camp semdangba atema pelaba metetdaksüogo.

Iba ya yimjung tanaben bener arutsü aser kintem tsüingda tesüiba nung meimtepa liyonga aruba ama alitsü merangba mapa ka lir ta Shirmay-i ashi.

"Onoki külemi inyakyonga aotsü atema jembia arur. Pai (Khemchand Singh) ajak dang tematibaji yimjung asütsüla ta ashir" ta paisa shisem.

Litan Sareikhong relief camp nung alirtemia pei pei talidaki onüba shiogo. Parnoki sorkar dang mapa shitak inyaktsü ayongzük.

Taoba Chief Minister N Biren Singh anenba sülen taküm February ita nungi Manipur nung President's Rule benoka lir.

Assam Congress-i Tezpur University nung bushisüingdangtsü akhanger

Guwahati, December 11, 2025

(Agencies): Assam Opposition leader Debabrata Saikia den MLA ana- Nurul Huda aser Sibamoni Bora nungeri CBI Anti-Corruption Branch dang Tezpur University nung senotsü tim mesüi amshiba aser ketdangsubaren nung tashimait alibatem bushisüingdangtsü shidi ka zülüogo.

Kaketshirtemi, tesayurtem aser staff temi küm aika item asoshi ken o tem benoka aruogo ta parnoki ashi.

RTI ajanga senotsü tim mesüi amshiba, tender nung tim masüba, özüing alema nisung shimokba aser retirement dues magütsüba indang Congress

lennirtemi ashi.

RTI reply ka nung Vice-Chancellor shimba indang tongti kulikakettem mali. December 6, 2025 nü Ministry of Education ajanga Prof Shambhu Nath Singh mapa nungi anentsü aser bushisüingdang ka tenzüktsü nangzüka lir ta parnokisa shidi nung shia lir.

Tepzur University nung contracts melii Rs 11.48 lakh diesel aliba aser scrap disposal indang mapa tim mesüi agütsü.

Iba university nungsa vendors ishika dang ser Rs 4.5 crore UGC grant book aser e-resource alizüka liasü aser iba nung taitüsü aketba kulikakettem lir.

Ano, 7 crore tender aser

Semiconductor Parameter Analyzer alizükba nunga vendors kar tejak repranga inyakba sayur.

HEFA projects nunga Rs 14 crore furniture alizükba, jenjang tasak agi water coolers aliba aser construction works nung Rs 153.71 crore endokba ken o tem lir ta Congress lennirtemi ashi.

University ket nung liaka Centre for Endangered Languages atema Rs 83 lakh jenjang MacBooks alizük aser iba audit nung taitüsü aketba certificates nguteta lir ta parnokisa shisem.

Congress lennirtemi CBI dang senotsü aser ketdangsubaren nung tim masüba ajak bushisüingdang asütsü ayongzükogo.

Manipur nung Chin-Kuki Liberation Army Commander apu

Imphal, December 11, 2025

(Agencies): Manipur kübok Churachandpur district nung Chin-Kuki Liberation Army (CKLA) nung tanishir ka puogo.

CKLA ya United People's Liberation Front (UPLF) indang armed wing lir.

CKLA/UPLF ya Kuki-Zo telungpur telok ka lir aser Suspension of Operations (SoO) kübok maden.

Manipur nung Kuki-Zo telungpur telok 25 tashi Centre

sorkar den SoO pact kübok lir ta ketdangsurtemi ashi.

Osang tejangja ka angazükba sülen Central security forces-i Manipur police den amalitepa mita aodang CKLA/UPLF nung commander-in-chief apu.

Iba nisung ya Seikhongam Baite (Ngamcha) ta jangjaogo aser pa ya Chandel district kübok Sugnu nunger lir.

Pa ya Churachandpur district kübok B. Phaicham nung jenoka liasü ta osang angazüker.

Seikhongam ya Thanglet Baite'er jabaso lir aser pa den külemi züingsemtemi Churachandpur jila nung mapang tatsüka CKLA aser UPLF tenüing amshia nisungtem pur ao aser tashiyim agi sen meshia aru.

Pa ket nungi M4 assault rifle ka, Colt ka, Cal 5.56mm SER 2404 (foreign-made), magazine, 5.56mm ammunition live rounds aser Nokia black-and-white keypad phone ka ngutetogo ta Manipur police-i ashi.



Jaiñtia National Council (JNC) den Daištong yimtsüing aser temeket nung alirtemi Bodbarnü Khliehriat nung Deputy Commissioner office kima nung lungkak aitba noksa nung angur. Meghalaya kübok East Jaiñtia Hills nung aliba Khliehriat nung özüing alema nija cement company ka nem ali agütsüba anema parnoki iba sentong agiogo.

Bolivia-i taoba tir Luis Arce puogo



La Paz, Luchii/December 11 (Agencies): Bolivia nung law enforcement ketdangsürtemi taoba tir Luis Arce ochi mashi inyakyim anema bushisüngdangba nung shilem ka ama puogo. Conservative tir Rodrigo Paz tenangzüktepba agiba sülen ita ka dang lir iba jenjang ya agiogo.

Paz-i aniba sorkar kübok ketdangsür tejen Marco Antonio Oviedo-i ashiba agi, Arce ya mapa nung aibelenba aser taoba lenir Evo Morales-i (2006-2019) aniba sorkar kübok economy minister inyakba mapang nüburtem indang rongsen ochi meshi-i amshiba atema aitsüogo.

Ochi mashi inyakyim anema raraba special police force kati

Associated Press news agency dang ashiba agi, Arce ya Bolivia yimtiba La Paz nung unit indang headquarters nung yua lir.

"Ochi mashi inyakyim anema raratsü atema iba sorkari telemtetba agiogo aser nüburtem idang rongsen mashiyimi amshirtem ajak onoki aputsü," ta Oviedo-i ashi.

Ketdangsürtemi ashiba agi, temeba jenjang nung ochi mashi inyakyimtem anema raratsü asoshi sorkar tasenba bendanga agütsür aliba Arce apuba ajanga kuli agütsür, ajisüaka Arce pusemertemi ashiba agi, pa apuba kuli tejangja mali aser yimden yimsüsüba tsütsü reshikangshi ka lir.

Ketdangsürtemi, lisopurtem aser sensaktia nung aliba

aluyimertem nongita yaritsü atema mejeta agizüka ayuba sen USD million 700 shi tangalen amshiba atema Arce aser tanga ketdaksürtem aitsüogo.

Bolivia indang mezüngbuba Indigenous tir ama Morales-i linük indang power structure melenshitsü aser lisopurtem nem taoba mapang dang nungi maongka timba agüja liasü.

Arce ya 2006 nungi 2017 tashi Indigenous Peasant Development Fund indang board of directors nung züngsem ka liasü, aser yimdakyimtsüngtem nung terenlok maparen atema senotsü lemozüksütsüji pa mapa liasü.

Iba mapang Arce-i senotsü kar miimzüka agi ta ketdangsürtemi ashi.

"Rongsenketzüng jenjang kanga mejungi raksatsür rongnungArce ya tongtubang lir," ta Oviedo-i ashi.

Bolivia indang attorney general, Roger Mariaca-i local media dang ashiba agi, police-i ken o ashishiba mapang Arce-i ola madoki alitsü atema pa temeden aliba beshidar. Pa okadaki ani mao tashi police ket nung dang yua atatsü.

Arce aitsüba ken o nung pa aibelena aliba ngutetra pa küm trok tepuokdaki yoktsü.

Bangladesh nung February 12 nü general elections agitsü

Dhaka, Luchii/December 11 (Agencies): Brehostibarnü Bangladesh indang Election Commission ajanga linük indang taruba elections ya February 12, 2026 nü agitsü ta sangdongogo, anungji taoba küm mepetmesü adoka Sheikh Hasina atsüngdokba sülen election mezüngbuba alitsü.

Bangladesh indang Chief Election Commissioner AMM Nasir Uddin-i linük nung mezüngbuba polls - the 13th National Parliamentary Election and the July Charter referendum - ya February 12 nü agitsü sangdong, ta The Daily Star ajanga ashi. July Charter ya Bangladesh nung democracy tanaben yanglushia institution balala temelenshi alitsü nükjidadong nung political party balalai meyonngem agütsüba document ka lir.

Elections nung vote agütsüba dak alia July Charter nung national referendum ka kasa anogo agitsü, koba ajanga executive tashi tem azüoka aser judicial independence tashi itshitsü densema state institutions nung temelenshi alitsü. Voting ya parliamentary menden 300 prongla nung mapang ka nung alitsü. Ibai Bangladesh nung twin polls mezüngbuba asütsü.

Sangdong ajanga ashiba agi nominations ya December 29,

2025 tashinung agütsütsü, koba December 30 nungi taruba küm January 4 tashi scrutiny asütsü. Nomination agientsü asoshi January 20 ya tatem asütsü, ta CEC-i ashi. Electoral symbols tem lemsatsütsü aser candidates indang final list ya January 21 nü adoktsütsü.

Candidates temi January 22 nungi February 10 tashi nübu yima jajatettsü, koba election agitsü ghonda 48 lia tembangtsü. Election Commission-i voters 127.6 million shi atema polling centres 42,761 aser booths 2,44,739 shi amenoktsü sentong renemogo. Polling ya anepdang 7:30 ako nungi nikongdang 4:30 ako tashi alitsü, ghonda ka talangba, kechaser voters temi pei vote den referendum ballots agütsütsü.

August 2024 nung taoba ato kilonser Sheikh Hasina atsüngdoka kaketshir temi anir nokdakba sülen ibai national election mezüngbuba alitsü. Iba sülen Chief Adviser Muhammed Yunus-i anir interim administration ajanga linük nung yimsü süa arur.

Interim government yagi Sheik Hasina'er Bangladesh Awami League inyaksangshi nokdanga lir, aser EC-i iba party indang registration mapang thinenogo. Interim government aser EC ajanga nokdanga aliba magien tashi Awami League

yagi elections nung shilem magitettsü. Party lenir aika jenshia senzür mesüra tepuokdak lir.

Aruya aliba elections nungya taoba ato kilonser Khaleda Zia'er Bangladesh Nationalist Party (BNP) aser Jamaat-e-Islami tsüngta tokteptsü südi ta amanger. Tang tasen tentetba National Citizens Party (NCP), kobai anir Sheikh Hasina anema nokdak, parnoka elections nung shilem agitsü.

Nüburtemi yimten yimsüsür anema nokdakba sülen Bangladesh tasen ka yangertsü atema aruya aliba elections ya otsüsütsü maongka alitsü, ta Bodhbarnü Yunus-i ashi aser ochi aser yimya shidak nung agitsüla ta shia liasü.

Tensa kumzüka ayutsü mechi tang mezüngbuba campaign posters tem nokdanger. Bendang lima nung alirtem postal ballots atema online registration system ka lir, aser Bodhbar nikongdang tashinung nisung 2,97,000 tenüng agütsüogo. Parnok indang ballots nung candidate tenüngtem masü party aser independent symbols tem kija alitsü.

Iba election ya Bangladesh indang democracy atema tongtipang tetendangba ka ama repranger.



Office of the

MONGSENYIMTI SENSO MUNGDANG

B.P.O MONGSENYIMTI P.O. CHUCHUYIMLANG

DIST: MOKOKCHUNG NAGALAND-798614

TENÜNGSANG YIMYIM:

Tsüngrem akhümtsüba ajemalua pei dak aketba sempet tajungtiba nung meyushiteta alima renlok den tsüngkang medema Libalirutetba den tanen makai alima shisatsü aser sempet walokshia litetba jenjangmong yateta sensosanger asoshi numadang khonang tulu bentsür arur nem Mongsenyimti Sensosanger Inti tenüng Mongsenyimti Senso Mungdang Mendendi ajanga tetushi tulu agütsür;

1. Sb. Bendangsunep Longkumer

(Wb. Talimeren aser Wt. Nungsangmenla jabaso)

ICN India Goa Supershow tetoktepba nung Hon Dogma Ana (2 Gold Medals) aser Taribi Dogma ka (Silver Medal) ajangzuktet.

2. Wb. Imkongtemjen Longkumer

(Wb.Sosangchiba & Wt.Ponazungla jabaso)

ajanga Ministry of Culture, Govt. Of India kübok Guru narokum ngutet.

Alakteta moatsüba sempet tem tajungtiba nung apayua amshitetba ajanga tarutsü lanu asensor asoshi tajangzük südaksütsü takoker nem Tsüngremi maneni tabensa shisa moatsütsü sensosangertem tamang sarasadem.

Sd/-

IMOTONG

President, MSM

Sd/-

S. NOKINLEMBA

Secretary, MSM

OFFICE OF THE

LONGKHUM YAR & LONGCHAR CLAN

INFORMATION

This is for information to all concerned with regards to the Government Notification by the Directorate of School Education advertised on 3rd Dec. 2025 vide No. ED/ESTD/GR-IV/APPT/2025 for the appointment of one post of MTS at GHS Longkhum that the Longkhum Yar & Longchar Clan will not allow any other candidate apart from the land owners for the advertised post.

Sd/-

Watiyangba Yar

Imkongsashi Longchar

ALI

TAYOKTSÜ

LIR

Old Showuba, four lane flyover anasa.

Tasazük mashi angutsü. Khehokhu Village nung

ali inoktsü menüngdak.

(Ao/Sangtam timba aliba tesem)

Contact: 9863826159

Myanmar nung mitkari mozüki ka amak; nisung 30 tepset

Yangon, Luchii/December 11 (Agencies): Myanmar nung military sorkari linük anüolen Rakhine state tongtubang mozüki ka amakba sülen shirangertem densema nisung 30 tepsetogo, ta telungpur telok ka, teyari agütsürtem aser tenük kuli agütsür kati Brehostibarnü ashi.

Iba lendong nung nisung 70 dak tema yirua liasü, ta parnoki ashi.

Rakhine kübok Mrauk U jila nung mozüki ya Bodhbarnü military indang tayimtsü kati bomb khalokja maka liasü, ta Arakan Army otongdar Khine Thu Kha-i ashi. AA pur ya military sorkar den rara arudar.

"Mrauk U General Hospital ajunga raksaogo," ta Khine Thu Kha-i Reuters dang ashi. "Mozüki indang indanga amakba ajanga nisung aik süogo."

Junta otongdar ka dang ken o jangjashitsütsü asüngdang saka telangzüba kecha magütsü.

2021 küm military-i Nobel laureate Aung San Suu Kyi-i aniba sorkar atsüngtokba anema nüburtemi longkak aitba tashiyim agi azüokba sülen Myanmar mepetmesü tulu nung lir.

Yipden 300 aliba mozüki ya amakba mapang shiranger sünga liasü, ta aid worker Wai Hun Aung-i ashi. Rara adoker aliba ajanga Rakhine state kübok tesem balala nung healthcare service tem inyaksangshi mesüi aliba ajanga mozüki sunga liasü.

Wai Hun Aung-i lemsatepba noksa ka nung mozüki raksar aliba aser asürtem tasü mang atem nung mepidaka aliba nguogo.

"Tanungba shirangertem teküzmzüka tesem bushia anirogo," ta pai Reuters dang ashi.

Mrauk U jila nung alir kati ashiba agi, Bodhbar aonung bomb apokba ola angashiba sülen pa iba tesemi aritepa ao.

"Ni tonga aoba mapang mozüki nung mi adoka liasü. Ni tasü mang aika aser nisung aika yirur angu," ta pai ashi.

Myanmar nung junta ket nung dang air force lir aser parnoki telungpurtem jenoka aliba tesemtem anüng ajanga maka arudar.

Taküm January nungi November ita tatem tashi nung junta-i anüng ajanga tesem balala 2,165 ben makogo, koba taoba küm dang nung timba lir.

Mrauk-U jila ya taoba küm nungi Arakan Army-i azüoker lir aser tawa iba jila anasa aiben raratepa arudar, ta Khine Thu Kha-i ashi.

Champions Lesgue: City, Arsenal, Juventus nungeri takok angu



Luchii/December 11, 2025

(Agencies): Bodhbarnü Santiago Bernabeu nung Manchester City aser Real Madrid na Champions League asaya City-i goal 2-1 agi kokogo. Asaya nung Nico O'Reilly aser Erling Haaland nati goal kaka idakja liasü.

Asaya nung mezügbuba goal ya Rodrygo-i Madrid atema minute 28buba nung idaktsü, aser asaya mezügbuba shilem nungbo City pur ano goal aika achitsü ama asaya liasü.

Ajisüaka Josko Gvardiol-i tongoktsüba ball temela ka goalkeeper Thibaut Courtois-i pupetba sülen minute 35buba nung O'Reilly-i goal ka idakja team ana goal kasasa aküm.

Iba sülen minute ti lir defender Antonio Ruediger-i Haaland alangdaksüba atema penalty ka agütsü, koba Norway nunger striker yagi aibelen mesüi idakja liasü.

Iba asaya akokba sülen Pep Guardiola-i aniba team ya Champions League table nung

pezübubai tuogo. Parnoki asaya trok nung point 13 ngua lir. Kasa mapang nung Real Madrid puri point 12 ngua parnok tenetbubai asepzüka luogo.

Kasa asayamung nung Arsenal puri Belgium indang Club Brugge goal 3-0 agi ayong ayonga koka, parnok asaya trok nung khien danga tamakok mongui asayaogo.

Asaya nung Noni Madueke-i goal ana idaktsü aser Gabriel Martinelli-i goal ka idakja parnok asaya akok.

Asaya trok asayaba ajak akokba sülen Arsenal pur top-eight nung league stage asaya tembangtsü aser parnok February ita knockout phase playoffs masayai March ita round of 16 indang indanga asayatsü.

Asaya nung mezügbuba goal ya Madueke-i minute 25buba nung idaktsü aser asaya tanabuba shilem tenzüker minute ana tsünga paisa Arsenal atema tanabuba goal idakja liasü. Iba sülen minute

teku dang lir Martinelli-i par team asoshi tasembuba goal idakja parnok asaya akok.

Maneni Champions League tanga asaya ka nung Juventus-i kidang goal 2-0 agi Pafos kokogo. Asaya nung Weston McKennie aser Jonathan David nati goal kaka idakja liasü.

Asaya metenzük tsünga team anaprongla point kasasa liasü aser Pafos puri parnoka iba asayamung nung asayatsü langa lir ta sayuogo, ajiüska parnok Juve mekoktet.

Juventus pur tang 17buba aser aser Pafos pur 26buba nung lir.

Asaya mezügbuba shilem nung team anaprongla kanga toktepa asaya-a goal idaktsütsü asoshi maongka nguteta asayaba sülen asaya tanabuba shilem nung McKennie-i minute 67buba nung Juve atema mezügbuba goal idaktsü aser minute trok dang lir David-i par team atema tanabuba goal idakja parnok asaya akok.

ISL Clubs temi AIFF dang Commercial Clauses melenshitsu mepeshi

Luchii/December 11, 2025

(Agencies): Indian Super League club 12-i Brehostiabarnü All India Football Federation dang December 20 nü Annual General Meeting amenba mapang Federation indang 'commercially restrictive' clause tem melenshitsu mepeshiogo. Parnoki ashiba agi tang aritepa jenjang magira domestic game tem chireptsü ana nung lir.

East Bengal dak alaka tanga ISL team ajaki ashiba agi, AIFF-i item clause tem memelenshira mesüra inyakim tapet ka magütsütetra parnok top-tier league atema temeden ya club tem nem mapang talangka atema agütsütsüla.

"AIFF-i, Constitution nung commercially restrictive clause tem agintsü nongitba sayutsüla mesüra December 20 nü taruba AGM amenba mapang melenshitsu," ta club temi AIFF tir Kalyan Chaubey dangi yokba shiti nung shia lir.

"Iba sülen sorkar aser club tem teyari nung federation-i tebandang kecha makai commercial partner shimtsüla.

"AIFF-i memulunga mesüra

tenüngdakba temelenshi bener marutetra mesüra league atema commercially viable framework ka magütsütetra Federation-i league indang temeden ya club tem nem agütsütsüla," ta shiti nung shia lir.

Club temi tawa majority owner ama national federation aser investor tem den league ya achayangtsü atema club tem consortium ka tentettsü asoshi inyakim ka asadangtsü asoshi AIFF dang mepeshiba sülen tang ISL club temi iba shiti agütsüogo.

Tawa AIFF-i ISL indang commercial rights atema bid asütsüpurtem jaok saka shingai telangzüba magütsü.

"Club tem nem commercial flexibility agütsütsüla, kong sponsor, investor aser long-term partner tem atsüa arutsü atema tashi agütsütsüba densema alitsüla. AIFF Constitution nung commercially restrictive clause tem meyanglushi mesüra magin tashi iba ya takoktsü masü. Tebilemba tajung liaka iba temelenshi bener maru tashi mapang talangka asoshi league structure meyanglutettsü," ta shiti nung shia lir.

Sports Personality of the Year award atema asayar 6 sangdongogo

Luchii/December 11, 2025

(Agencies): 2025 BBC Sports Personality of the Year award atema asayar trok tenüng sangdongogo.

England nunger football asayar Hannah Hampton aser Chloe Kelly na, rugby union asayar Ellie Kildunne, darts asayar Luke Littler, golfer Rory McIlroy aser Formula 1 driver Lando Norris nunger nominate süogo.

Vote ya December 18 nü BBC One aser BBC iPlayer indang show nung agitsü.

Iba sentong ya Gabby Logan, Alex Scott aser Clare Balding nunger lenisüba nung agitsü aser Salford nung MediaCityUK nungi live sayutsü. Iba sentong ajanga ita 12 tashi asaya balala takok ngua asayayonga aruba benjungtsü.

BBC Sport director Alex Kay-Jelski-i ashiba agi, "saisabong nung taküm alizüing aika tongtetogo, kong

asayartemi shilem agiba ya puti otsü kaket nung zülua ayutsü langa lir."

"Takoktem jangradema reprangogo aser parnok takoktem asoshi tetushi agütsütsü aser linüki BBC Sports Personality of the Year 2025 ama shimlir aji reprangtsü matateter," ta pai ashi.

Nüburtemi tetushi agütsüba aonung online ajanga vote agütsütettsü aser iba atema osang tejangja sentong agiba mapang metetdaksütsü.

Team of the Year award-a nüburtemi shimtsü, aser iba atema tokteptsüpurtem December 15 nü sangdongtsü.

Kasa aonung Young Sports Personality of the Year, Coach of the Year, Lifetime Achievement aser Helen Rollason Award dena agütsütsü.

World Sport Star award atema vote agütsü tenzükogo aser kasa aonung takoker sangdongtsü.

Australia captain Cummins Ashes Test tasembuba asayatsü



Luchii/Decemeber 11, 2025

(Agencies): Australia captain Pat Cummins taruba hopta England den Adelaide nung tasembuba Ashes Test asayatsü jangjaogo.

Pa teberem nung timtem aliba ajanga mezügbuba Test ana nungbo masaya, koba Australia-i kokogo.

Brisbane nung wicket ti agi asaya akokba sülen Australia squad nung pa dak alaka tanga asayarbo mebendenlok.

Ashes meyipa agitsüba atema Australia team-i Adelaide nung asaya draw dang

asütsü nüngdaker, aser parnok asaya kokra parnok asayamung kokatoktsü.

Ashes asayamung nung England team-i asaya ana mekoki aliba nungi meyipa tur asayamung khien danga koka mali, aser taküma parnok kasa jenjang nung lir.

Tasembuba Test ya December 17 nü 23:30 GMT, 16 December) tenzütsü.

Cummins ya July ita nungi khien danga asaya mali, saka mezügbuba Test ana asayaba mapang pa squad den külemi training agia aruogo.

Pa tanabuba Test asayatsü akok ta jembia aruogo aser asaya metenzük tsünga anogo ka jelia public selection meeting nunga shilem agia liasü, ajisüaka masaya.

Australia squad nung tanungba asayartem kasa dang asütsü. Pace bowler Josh Hazlewood hamstring aser Achilles tebilemtsü aliba ajanga asayamung nung masayatettsü.

Fast bowler Jhye Richardson-a, Adelaide nung Australia team den training agitsü. Pa tapu yiruba sülen tang anepaluba mapang ka lir aser asayamung tatemlenbo asayatsü imlar.

Off-spinner Nathan Lyon, Brisbane nung asaya nungbo masaydaksü, saka pa Adelaide nungbo asayatsü imlar. Cummins den külemi Lyon asayara seamer Brendan Doggett aser Michael Naser na masayatsü.

Australia team ano Usman Khawaja dak sendakba nung telemtetba ka agitsü lir. Pa teberem nung tebilemtsü adokba ajanga mezügbuba Test nung opener masayatet aser iba ajanga tanabuba Test nunga masayai liasü.

BILEMDANGANG

"Nai tanger indang tashi mait ajak metetnüba agi na kecha tajangzük mangutsü."